

三
雲
籌
俎
考

三雲籌俎考

都御史臨海王士琦輯

安攘考

夷狄之爲

中國患也自周已然方其盛時惟修內治以
威格懷來不聞師武臣力以殄滅戎狄日
鯁鯁也蓋必內安而後能外攘內苟安矣
卽不攘庸何傷不然以漢武之掃幕犁庭

而無採于虛耗以漢季之稱臣內徙而祗
速其敗亡則治亂之未鑒已我

國朝自

高皇帝驅逐胡元

成皇帝掃清磧漠猗歟盛矣迨東勝旣失虜
焰復燃景泰天順而後雲中應朔之區時
時備虜至嘉靖則無歲不蹂踐爲戰場矣
九重之霄旰百辟之箸籌無非是者而卒未

覲策勲告

廟一張撻伐之威然而政肅民安曷嘗少損
順治威嚴之盛也天厭夷惡胡雛內附受
封納貢嘉其恭順而許之互市者四十餘年
外不必攘而燧熄歲登恬熙殷富太平景
象誠古今史冊所未記覲者頗歲久玩愒
虜漸縱恣長慮者時切隱憂焉余新承
簡命敢不兢兢嘗竊籌之人皆謂貢市久則

邊備衰不知邊備修而後貢市久皆謂虜
情叵測或有乘間而跳梁不知虜惧閉關
甚于爭雄而對壘故繼自今不當問夷情
之順逆惟宜得制馭之機宜勿畏驕夷之
強悍而濫給藝惠以淫其慾勿狎久款之
熟夷而頻減峻裁以失其情恭順酬勞雖
大不吝攘竊啓釁雖小必懲以恩威作戈
鋌以口舌當斧鉞久之夷知我神氣日壯

則驕寒自銷作用既殊則心膽自折不動
聲色而安攘在握百年無事矣後之仔肩
者其無豔衛霍之殊勛而坐隳表餌之成
畫哉

安攘

周顯王三十六年趙築長城以防胡

九年趙致胡兵

十五年趙破胡復築長城自代并陰山下至高闕爲塞
四十二年東胡寇代

漢高帝六年韓王信以馬邑叛降匈奴入寇

七年冬七月帝自將討信將軍周勃樊噲薈夏侯灌嬰
擊信匈奴于武泉敗之

帝追匈奴至平城被圍七日解

十二月匈奴寇代代王喜奔京師

文帝四年匈奴入寇將軍張說出塞擊之

十五年匈奴入寇

後六年匈奴寇雲中車騎將軍令勉來屯飛狐

景帝元年五月匈奴寇代

中三年匈奴入寇中尉魏不害來屯高柳

武帝元光二年將屯將軍王恢等來伏馬邑誘擊匈奴
不克擊而還

六年春騎將軍公孫敖輕車將軍公孫賀出塞擊匈奴
無獲而還

元朔元年秋將軍衛青將軍李息出塞擊匈奴大破之

遂取河南地立朔方郡

三年夏匈奴寇代太守共友死之

四年夏匈奴寇代定襄

五年春車騎將軍衛青出塞擊匈奴破之

秋匈奴寇代都尉朱英死之

六年三月大將軍衛青出塞擊匈奴敗之

四月大將軍青復出塞擊匈奴絕幕而還

元狩二年夏匈奴寇代霍去病擊敗之過焉支至祁連

山而還

三年匈奴寇定襄殺掠千餘人

四年四月大將軍青驃騎將軍去病擊匈奴大破之青
部前將軍李廣失道自殺青封狼居胥而還

元鼎五年九月匈奴寇五原

六年秋浮苴將軍公孫賀出擊匈奴無獲而還

元封元年帝出長城登單于臺勒兵而還

大初三年四月築塞外城障遊擊將軍韓說來屯秋匈
奴寇五原壞塞外城障

四年正月韓說出塞擊匈奴

天漢元年遣中郎將蘇武使匈奴爲所拘留

征和二年九月匈奴寇五原

三年正月匈奴復寇五原

三月貳師將軍李廣利出擊匈奴別將李陵戰敗降虜
昭帝始元四年秋匈奴寇代

元鳳元年匈奴寇五原

宣帝本始二年秋雲中太守田順及前將軍韓增出塞
擊匈奴敗之

甘露二年十二月匈奴呼韓邪款塞

三年春正月居匈奴于塞下

元帝初元元年輸匈奴粟

永光元年秋歸匈奴于北庭

二年秋七月詔雲中太守韓次君擊羌不果行

王莽篡漢三年莽遣其中郎將蘭苞副校尉戴級出塞
誘降匈奴匈奴來攻

四年莽遣其東域將嚴尤率烏桓兵來屯

光武建武五年十二月盧芳自匈奴入于五原以叛
六年夏六月盧芳寇代太守劉興死之

十年春正月大司馬吳漢擊芳匈奴敗之

冬十月驃騎將軍杜茂來屯飛狐

十三年春正月五原歸正芳奔于匈奴

十四年匈奴寇高柳騎都尉張堪擊走之

十六年冬十月盧芳入于高柳

十八年夏四月芳復奔于匈奴

二十年夏五月匈奴入寇

二十一年冬十月匈奴烏桓入寇伏波將軍馬援來行

障塞

二十四年春正月南匈奴款塞

二十五年冬十月居烏桓于塞內

二十六年居南匈奴于雲中

二十七年冬徙南匈奴于西河美稷

明帝永平五年冬十二月北匈奴寇雲中南匈奴擊却

之

十六年春二月度遼將軍吳棠及太僕祭彤騎都尉來
苗烏桓校尉文穆出塞擊北匈奴無獲而還

北匈奴寇雲中太守廉范擊走之

建初元年耿秉爲度遼將軍

章帝建初八年北匈奴款塞

章和元年秋八月北匈奴款塞

和帝永元元年夏六月車騎將軍竇憲出塞擊北匈奴
大破之登燕然山刻石勒功而還

二年北匈奴款塞來朝竇憲遣使迎之復遣兵襲擊破

之

四年立北匈奴於除鞬爲單于

五年南匈奴左賢王師子來居五原界

六年春正月度遼將軍朱徽殺南匈奴單于安國立師
子于五原

安帝永初二年夏六月烏桓寇代

秋九月南匈奴反及烏桓鮮卑寇五原

四年春正月梁瑾爲度遼將軍討南匈奴降之

元初五年秋八月鮮卑寇代

六年秋七月鮮卑寇馬城度遼將軍鄧遵擊破之

建光元年夏五月耿璆爲度遼將軍

秋九月鮮卑寇居庸雲中太守成嚴功曹楊穆死之鮮卑遂圍馬城度遼將軍耿璆擊却之

延光元年冬十月鮮卑寇定襄

二年冬十一月鮮卑寇曼柏

三年秋鮮卑寇高柳

順帝永建元年秋八月鮮卑寇代太守李超死之

陽嘉二年秋八月鮮卑寇代

四年冬十月烏桓寇雲中

永和五年夏四月南匈奴寇代度遼將軍馬續擊破之

五月詔度遼將軍續招降南匈奴

冬十一月中郎將張耽來討南匈奴降之

桓帝永壽二年秋七月鮮卑寇雲中

延熹元年冬十二月南匈奴及烏桓鮮卑入寇

夏六月南匈奴烏桓鮮卑入寇

靈帝建寧元年冬十二月鮮卑入寇

熹平六年夏四月鮮卑入寇

秋八月烏桓校尉夏育及中郎將田晏出塞擊鮮卑敗

績

獻帝建安二十三年夏四月代烏桓反魏王曹操遣其

子樟來擊破之

昭烈帝章武元年秋鮮卑入居于代

後主建興四年魏鴈門太守牽招來擊鮮卑于雲中敗之

六年秋鮮卑圍魏烏桓校尉田豫于馬城

晉懷帝永嘉四年秋南匈奴止部反并州刺史劉琨以索頭來討平之封索頭拓跋猗盧爲代公

元帝大興元年夏五月代郡太守辟閭嵩謀討段匹磾不克死之

穆帝昇平三年燕居匈奴賀賴頭部于平舒

哀帝隆和元年代王什翼犍至代郡代始入于拓跋氏
孝武帝太元元年秦主堅以劉衛辰屯代分代爲二置
戍雲中

秋八月劉顯納拓跋窟咄于代魏王珪擊走之

十六年魏主珪屠五原誅劉衛辰于說跋城

安帝隆安二年魏定都于平城郎今大同府魏主珪稱皇帝

命朝野皆束髮加帽

文帝元嘉元年柔然寇雲中魏主擊却之

二年魏宜城王奚斤將軍安原閭大肥出塞擊柔然絕
幕而還

魏殲新民于五原

梁武帝普通三年魏居柔然于懷朔之北

四年柔然入寇魏驃騎將軍李崇出塞討之至瀚海不及而還

五年拔陵寇雲州

六年魏廣陽王琛邀擊于朔州破之

七年恒州勅勒反魏都督高士貴來討柔乾勅勒反魏別將余朱榮來討平之

七月鮮于阿胡反陷平城

元帝承聖元年齊主至代遂出塞擊庫莫奚破之

二年齊居柔然于馬邑川

陳文帝天嘉五年周揚纂來屯靈丘

梁敬帝太平二年宇文覺篡西魏爲周

十二年周司徒于翼來行障塞

隋文帝開皇二年突厥寇馬邑柱國李崇擊破之

三年魏王爽出塞擊突厥大敗之因城原陽雲內紫河
鎮而還

七年春正月突厥入獵于恒代

十九年左僕射高穎出塞擊突厥都藍可汗破之

冬十月居突厥于朔州

二十年太平公史萬歲出塞擊突厥破之

仁壽元年行軍元帥楊素出塞擊突厥破之

煬帝大業元年突厥啓民內附遂牧畜于定襄馬邑間
詔諭出塞

三年帝至雲州遂幸啓民帳

九年護北番軍事裴矩誘突厥史蜀胡悉于馬邑斬之
秋突厥始畢寇馬邑太守王仁恭擊却之

十三年馬邑校尉劉武周殺仁恭附突厥以叛

夏五月唐公李淵因帝南征詐詔集馬邑太原西河鴈
門丁男爲兵

唐高祖武德元年頡利可汗歸五原

二年劉武周入寇十一月秦王世民來討武周破之
五年冬十一月突厥入居五原總管任城王道宗逐出
之

六年夏六月高滿政以馬邑降

秋突厥寇馬邑總管高滿政擊却之

冬十月突厥入寇陷馬邑總管滿政死之

十二月突厥以馬邑請和

七年突厥寇馬邑總管秦武通擊走之

太宗貞觀四年春二月總管李靖李世勣出塞擊突厥

大破之

夏四月總管張寶相禽突厥頡利可汗歸于京師
置定襄雲中都督府居突厥于塞下

十三年秋七月歸突厥于舊部

十五年冬十一月突厥來奔

十二月總管李世勣出塞擊薛延陀大破之

十七年薛延陀寇定襄總管世勣擊走之

永隆元年春三月總管裴行儉出塞擊突厥破之

秋七月突厥寇雲中都督寶懷哲中郎將程務挺擊走

之

永淳元年冬十月突厥寇雲中都督薛仁貴擊破之

弘道元年春三月突厥寇雲中司馬張行師死之

夏五月突厥寇蔚州刺史李思儉死之

六月突厥寇豐州執都督崔智辯以歸

中宗嗣聖元年秋七月突厥寇朔州將軍程務挺擊却之

十五年秋八月突厥來攻陷蔚州

景龍二年春三月城三受降城

玄宗開元三年夏四月突厥款塞

代宗廣德二年僕固懷恩攻太原不克奔雲州

冬十一月僕固懷恩以吐蕃寇豐州守將馬望死之

貞元八年夏六月徙西受降城于天德軍

九年夏五月回鶻入寇

文宗太和四年置代北行營沙陀朱邪執宜爲招撫使
開成五年冬十月回鶻款塞

武宗會昌元年秋九月詔備回鶻

冬十二月回鶻入屯塞下

二年秋八月使者來喻回鶻出塞

三年春正月回鶻入寇節度使劉沔朔州刺史石雄擊
破之

二月黠戛斯款塞獻名馬。

懿宗咸通十年冬十月朱邪赤心從劉沔破回鶻拒吐
番詔賜姓名李國昌進大軍節度使國昌與子雲中
守捉使克用合兵以叛

僖宗乾符五年春正月李克用殺防禦使段文楚
廣明元年秋七月克用奔于達靼

昭宗大順元年春二月克用寇雲州

秋九月李匡威攻蔚州十一月蔚州陷

二年秋七月李克用陷雲州

景福元年春二月李匡威攻雲州

二年夏五月李匡威戍蔚兵潰

乾寧四年秋九月晉王李克用來討劉仁恭于木瓜澗
敗績

天祐二年晉王克用會契丹于雲州

十三年秋八月契丹入寇陷朔州

冬十一月契丹陷蔚州

後唐莊宗同光二年蔚州歸正契丹復寇蔚州

四年夏四月契丹寇雲州

五年春正月契丹陷寰州

長興三年冬十一月蔚州刺史張彥超以州叛降契丹

潞王清泰元年秋九月契丹來攻次于雲州分掠靈丘
三年河東節度使石敬瑭割蔚朔雲應寰及幽涿薊檀
瀛漠新媯諸州以賂契丹

晉高祖天福二年春二月契丹主至雲州判官吳繼拒
之

夏六月召雲州判官繼歸契丹入雲州

五年夏六月趙崇以朔州歸正

冬十二月契丹陷朔州

晉出帝開運元年秋八月鎮兵來取飛狐不克而還

周太祖廣順三年春三月契丹主至應州

宋太祖開寶五年秋七月契丹主至雲州

六年春正月契丹主至應州

太宗太平興國七年秋八月契丹主至雲州獵于祥古

山

雍熙三年都部署田重進潘美來取諸州克之契丹兵
至諸州復陷

代州刺史楊崇及契丹戰于陳家谷死之

真宗景德元年冬十一月契丹主至桑乾

六年春三月契丹置雲朔尉應轉運司

天禧二年夏五月契丹主至雲州

仁宗慶曆元年秋八月夏元昊陷豐州知州王餘慶兵馬都監孫吉死之

四年冬十一月契丹號雲州爲西京置大同府

神宗元豐八年春二月契丹主至應州

徽宗宣和元年春二月契丹留守蕭乙薛發兵定奉聖四年春正月契丹主至雲州三月金粘沒喝敗契丹兵于北安州契丹主奔夾山金人遂陷雲州

六年夏使使至金受地

七年春二月契丹主奔于應州金人執之以歸

十二月金陷蔚朔諸州

欽宗靖康元年夏四月夏人入寇陷天德武州金人襲取之

高宗建炎四年冬十二月金坑客戶

孝宗乾道元年金置應州招討司

二年春三月金主至雲州

寧宗嘉定三年秋八月金留守胡沙虎及元木華黎戰于定安敗績元遂陷雲朔豐勝諸州

七年春二月元攻武州金刺史楊沃衍禦却之

理宗寶慶元年秋八月元主至雲州

元順帝至正十九年春二月都督孛羅帖木兒來鎮大

同

二十四年夏四月李羅帖木兒反

二十五年夏四月陝西行臺擴廓帖木兒來襲大同

國朝

高皇帝洪武元年右丞薛顯叅政傅友德陸聚來取大同禽元裔右丞等三十四人以歸

二年元擴廓帖木兒奔大同副將軍常遇春北伐擴廓奔甘肅其守將竹真棄城遁遂取大同

此大同自石晉棄割之後四百餘年復合于中國也

二月都督汪興祖來守大同

將宣武振武崑山三衛兵兩敗元兵斬獲甚衆此將
臣鎮守大同之始

三月都督興祖取武朔州禽元知院馬廣等六百三十
四人

八月元脫列伯寇大同偏將軍李文忠右丞趙庸擊破
之

遇春北伐還次柳河川而卒文忠代將其軍文忠至
太原聞脫列伯攻大同甚急與庸謀曰吾等專制閭
外今大同受圍若俟進止恐失機會于是率諸將譚
濟等出鴈門過馬邑抵梅峪口遇元邏卒數千與戰

敗之擒其平章劉帖本進次白楊門又禽所謂四大王者前軍去大同三十五里阻水而壁文忠密遣人與城中都督興祖期是夜脫列伯悉衆來攻文忠堅壁不動以二營委敵督令死戰不之救自寅至辰度已疲分軍疾馳薄其陣城中亦開門出腹背奮擊大破之追至炭窖擒脫列伯降其衆進兵東勝州至莽哥倉而還初元主北奔命脫列伯以重兵攻大同規恢復及是乃絕意北竄

三月指揮童存道及北虜戰于斷頭山死之

時諸將北征存道從中山侯湯和守合墩不刺營至

陽和北境斷頭山遇虜力戰死之

六年虜寇武朔臨江侯陳德輦昌侯郭子興禦之師至虜夜遁

八月虜寇朔州指揮謝彥擊破之

十月副將軍李文忠出塞擊北虜禽其太尉伯顏不花十一月北虜寇大同大將軍徐達副將軍文忠馮勝禦却之

文忠已退師虜酋王保保復寇大同是時諸將分屯

代嶧間達聞警復向大同至猫兒庄

在陽和北代縣遇雪退

壁于鴈踏堡邏騎獲其平章鄧孛羅帖木兒達詰之

知懷柔有伏兵分兵拚擊禽其將康同僉王保保遁

七年指揮景

名缺

出塞擊虜破之

虜數出沒

詔文忠北伐文忠時駐代縣發景出白

登遇虜禽其國公孛羅帖木兒

八月文忠出塞攻大寧克大石崖至豐州

文忠出塞擊虜斬其魯王及司徒荅海俊平章把都
知院忽都得魯王妃蒙哥顏于是北虜乃兒不花遣
人款塞 詔許之

征虜大將軍馮勝出塞定散不剌地踰月還

三十二年燕王至大同

由紫荆歷廣昌蔚州進大同諸將張玉朱能薛祿陳亨等子愆皆以兵從

成祖永樂八年 上親征北虜

先是建文末北虜主坤帖木兒非元裔也韃靼太師阿魯台統其部落求蒙古之族本雅失里立之永樂七年遣給事中郭驥齋書諭令通好爲失里所殺八月淇國公丘福出塞擊虜敗績 上乃決意親征明年三月 車駕出塞五月至斡灘河元祖始興地也本雅失里率衆拒戰 上麾前鋒敗之六月班師阿魯台復來拒敵 上率精騎徑衝敵陣阿魯台敗走

次擒胡山勒銘而還

二十年阿魯台寇興和殺守將指揮王煥 上將親征
大破之

阿魯台寇興和守將王煥戰死 上親征至鷄鳴山
虜聞之夜遁 上曰所以羽翼魯台爲逆者元良哈
也麾兵進擊斬首數百級抵其巢穴收人口牛羊駝
馬十餘萬而還

英宗正統十四年北虜入寇總兵官朱冕敗績

虜由陽和入冕及西寧侯宋英禦之俱沒于陣

八月車駕幸大同

初虜入寇中官王振力主親征上至萬全聞英
冕敗詔郭登副廣寧伯劉安鎮守大同時兵勢搶
攘人情恟惧虜聞駕北征佯退以伺上遂幸鎮
城王振猶主北進鎮守宦官郭敬密言于振以爲決
不可往時有黑雲如繖覆營上又雷雨大作振始沮
乃議班師副總兵登言于學士曹鼐張益曰卽歸宜
入紫荆虜情叵測也旣而下令入紫荆人情大安行
四十里忽折而東復道居庸是以有土木之變上
旣北狩虜旋入寇奉車駕至鎮城下要金帛郭登
閉門不納上傳旨曰我與登有姻婭何以外我登

使人奏曰賴社稷神靈有君矣臣奉命守城不敢擅開閉知府霍瑄宦官郭敬括公私萬餘金以賄虜虜笑而不應登曰給我耳不若謀刼營奪駕集壯士與盟或以危言沮之不克出虜亦驚疑而去

棄東勝

國初置東勝諸衛然多事草創什伍虛耗至是畏虜勢擁逼內徙諸衛遂棄東勝左右雲川玉林諸舊地景皇帝景泰元年二月北虜入寇郭登擊破之

虜數得志往來恣肆登拊循將士激以忠義至是入寇登提兵壁水頭漏下虜連營至登召壯士問計或

言衆寡不敵宜早退登奮然曰軍已去城百里退則爲敵乘言退者斬徑薄虜營登先登陷陣追奔四十餘里至栲栳山而還斬首二百級

六月虜寇蔚州

少保于謙議增紮荆倒馬屯田是年八月 上皇車駕還京師

四年北虜入貢

北虜也先弑其主脫脫不花并其部落遣使入貢自稱大元田盛大可汗 朝議報書因其部落舊號稱瓦喇王于謙曰今次入貢旣由甘肅大同復由宣府

獨石而來各處道途俱有虜通伺門窺隙可慮爲甚
請行邊將飾備

叛賊小田伏誅

田邊人降虜也先信用之與喜寧等待卽王偉旣至
邊受兵部于謙密計圖之至是小田隨虜入貢偉親
至陽和城納之因其行獨後伏勇士千道執斬之給
曰彼思其親亡去虜不疑邊擾大息

英宗天順四年八月北虜入寇

自威遠入總兵官高陽伯李文素怯懦擁兵退避虜
遂抵鴈門掠朔代忻嘯砲火徹于京師大學士李賢

倉卒入奏乃 詔發兵倒馬紫荆以備畿甸于是都督顏彪屯紫荆馮宗屯倒馬虜初見鎮兵不戰意大恣肆及三關屯兵悉至鴈門虜始退

憲宗成化九年北虜入貢

虜酋脫脫遣使打關帖木兒等四十餘人貢馬許之十三年春北虜入貢

虜酋滿都魯訖加思蘭遣使桶哈剌河忽平章等三千餘人貢馬駝 詔許一千七百人餘省諭令還巢虜告饑鎮撫官廩之而去

孝宗弘治十三年夏北虜入寇

詔副總兵姚信立功

自贖

先是北虜小王子數求入貢而虜酋火篩及脫羅千之子大節頗雄黠爲部衆所服小王子不能制至是火篩大節分道自大同入寇西路歷威遠左衛駐營朔州東路歷天城陽和駐營蔚州之煖泉散掠屬邑副總兵姚信遊擊陳廣李祥擁衆堅壁不敢戰詔平江伯陳銳侍郎許進進師討賊亦不敢嬰其鋒虜縱掠數日引去巡按御史趙鑑疏論信廣祥罪詔立功自贖

十七年北虜遣使求貢

虜酋小王子遣使款塞意甚懇至撫鎮以聞 詔許
二千人入貢已而不至降者言虜中變有異志乃
詔飭邊備

十八年六月北虜寇應州

由懷仁入

七月北虜寇宣府副總兵官黃鎮遊擊穆榮赴援敗績
虜由新開口入至宣府虞臺嶺大同兵及宣府總兵
官張俊副將白玉遊擊張雄等禦之虜縱數千騎嘗
我軍玉置營土阜虜望見指笑曰彼自落乾地可立
敗也乃合兵圍我軍數重絕汲道止留隘地一隅時

俊別營在外不知其計以兵來援因與王及榮合營
虜復斷隘道于是內外不相聞糧水俱絕諸軍營中
掘井深十餘丈不得泉遂大困爭飲馬溲咀馬矢凡
七日天大雨雹賊乃解去士卒死者八千人馬畜甲
仗盡爲虜有

武宗正德九年北虜寇蔚州

由宣府至復由順聖東西城以出

十一年北虜入寇副總兵官安國及偏頭關副總兵官
郭錦延綏遊擊杭雄禦却之

虜由平虜水泉營梨兒墩入至鎮西衛安國郭錦會

兵禦之至土溝覘者言虜勢甚衆山西都御史李鈇
大同都御史王憲檄雄及附近兵悉至乃分三路並
進斬首百四十級虜退

冬十月 車駕幸陽和

北虜寇應州

鎮兵出戰有功時閣宦在事實實浮于功云

十三年七月 車駕幸大同

肅宗嘉靖五年北虜寇井坪中路叅將李瑾擊破之

虜寇西路井坪地中路叅將李瑾馳兵赴之時西路
叅將劉鎧遊擊李鑑兵先至惶惧不知所出瑾爲申

令戒衆合兵置陣先據荷葉山虜數衝突不爲動最
後以大砲擊其中堅而自督勁騎馳下擊之虜披靡
引去

八年北虜入寇

虜酋小王子糾套虜七萬餘騎由井坪入遂掠朔州
至偏頭關乃退

九年北虜寇威遠

黃榆山人守備賈英出戰

十年北虜入寇

虜入大同塞撫臣疏請貽書召小王子來歸兵部尚

書李承勛以爲不可乃止

十月北虜入寇

夾鎮城西下總兵官彭煥堅壁南山不敢戰虜遂入
懷仁山陰至廣武大掠時 廷議將出京營兵禦之
旣而虜得利去乃止

十一年北虜寇威遠

由臘鷄屯入

十二年北虜寇右衛

由雙城入

十三年叛兵以北虜入寇

先是嘉靖三年五月巡撫張文錦以大同北無亭障
虜易闌入議城紅寺臚園窯山墩水盡頭沙河等堡
工將就議屯戍欲于鎮軍內摘發二千餘以往或勸
文錦召募充之不聽指揮賈鑑者故西路叅將以言
事爲文錦所幸力贊之文錦曰令行自近我先以三
標下鎮撫親兵部曲往軍中服矣三標下故素游惰
且有家業聞當發大恐于是伍豪郭鑑柳忠陳浩胡
雄郭巴子等百餘輩聚謀抗勿往文錦因薦賈鑑爲
叅將令督工趣以當發者兵護役鑑擇美好土田私
之後諸軍墾田工甚急諸軍曰首畫城戍之策者鑑

也又多自私重困我殺之役可罷遂擁殺鑑叛出塞
營于焦山文錦聞變遣都指揮徐輔大同知縣王文
昌再往招撫叛卒還且共約曰毋解散聞砲聲卽合
劫掠衢市不可制已而文錦下令跡謀殺鑑者卽夜
舉砲攻院門文錦被害劫府獄兵仗出罪人奪諸城
門自守之間遣使走虜求附而推廢總兵山陰朱振
爲主時振以賊繫獄怨望喜禍陰爲郭鑑等畫策九
月上命都御史蔡天祐總兵桂勇來討叛諸叛猶
屯結不解天佑密捕二十餘人誅之衆稍戢會叅將
李賢往征回夷取道大同諸叛訛言曰此屠城兵至

夫復譟聚殺王文昌曰文昌給我天佑密疏請勦十
二月以戶部侍郎胡瓚都督魯綱提京薊兵數萬來
次陽和瓚密檄桂勇擒首惡勇僞若不罪郭鑑者召
而賜之食令家人卽食所斬之仍擒餘黨三十餘人
函首以獻越二日鑑父郭巴子復率餘黨譁曰鎮府
賣我也始言見原而今盡殺之耶分開城門譟而攻
勇執之幽于葉總兵第天佑時臥疾急輿而至反覆
曉譬勇得不死間行還京師諸卒訴天佑乞哀佑曰
能擒首惡兵猶可止諸卒乃擒徐毡兒等四人以獻
斬之郭巴子匿去諸逆黨仍推振爲主瓚綱畏縮自

知力不能辦遂自軍中上書爲振乞節鉞鎮守大同以安軍心舊犯一無所問反言天佑專事姑息難消邊患上切責之璲綱班師于是賊首徐毡兒郭巴子胡雄輩見師還事定不復藏匿四年春二月天佑督親兵一時捕獲四十餘人悉斬以殉下令曰此後有再告前變者卽以其罪罪之人情始定朱振罷十二年以李瑾爲總兵官振雖閑廢不歸山陰徘徊鎮城凡大同帥有區畫必與之謀振陰出以示惠于諸軍瑾至一切謝絕振憤恚結死士以伺瑾知瑾束軍嚴苛又新議于天城左浚濠以遏虜騎時兵部侍郎

劉源清爲總制期三日竣事振遂以危言激之于是
前漏誅王福勝李富子等復倡亂從者六七十人圍
瑾解瑾知事急率其弟玙執弓矢登門拒戰矢盡嘆
曰吾爲大將豈死亂手乎解胄自殺遂共劫庫出兵
復脅都御史潘倣令草疏言鎮臣苛刻激變請置勿
問 朝議不可源清時駐陽和榜示鎮城曰五堡之
變 朝廷處太寬今復戕主帥天討所必誅也五堡
遺孽偶語謂欲追理甲申事益不自安嬰城拒命諸
爲桂勇及蔡天佑所用擒捕首惡者悉搜殺之遣人
以金幣女伎遺北虜乞援遠近大振 詔源清進兵

以部永爲總兵討叛叛人復推朱振爲主源清遣僉事孫允中入城諭曰太師且至能釋兵以迎不問諸卒譁潘倣乃令允中及諸裨將擒斬二十餘人函首軍門乞緩師不許黎明源清師至城斬關入大肆殺掠諸卒及五堡擁指揮馬昇楊麟爲渠帥閉城門弗啓少頃部永師至亂兵開門迎敵殺我裨將一人潘倣孫允中反覆馳諭不聽時叛兵所遣走虜乞援者爲邏騎所獲源清得朱振爲諸卒區畫通虜狀僞召振至幕府計事因出邏獲者示之振飲藥死而虜酋吉囊青台吉擁五萬騎至矣永兵駐城下不敢戰源

清出兵聚落與戰失利叛兵王福勝等納虜衆十數人入城指代王府示之曰兵退以此與汝小王子居虜咬指謝福勝欲盡納虜入城諸叛或以爲不便未決而援兵陝西遊擊某者潛出塞襲虜輜重虜聞之亦疑畏分兵掠應朔懷仁諸郡邑羽檄達京師中外洶洶議遣使九邊募兵益之源清上言請別設總制禦虜而已專事攻城上不允下勅曰叛卒殺主將法不可赦旣云脅從不問何又引水灌城大同北門要地祖宗所遺必欲城破人誅何由興復源清聞之始不敢濫殺而遠近亦知用兵非朝廷意也于

是戶部郎中詹榮在圍城中素平出納爲衆所信服
計曰叛兵同惡不過數十人得軍門一札就中圖之
一裨將任耳何以勦爲乃具謀軍門而召遊擊戴廉
謀廉曰此非得馬昇不可榮召昇激以大義昇委心
焉言于衆曰自兵斷炭路城中凍甚詹戶部有信義
况之一出乞軍門可生也遂挿血盟會源清解任張
瓚代爲總制榮規畫已定出遇奉差兵部主事楚書
于途書手榮曰大事可就願與共之榮曰城中不知
德音今藉公齎詔入一省慰之則事濟矣書從之
入城詒賊曰炭路許通然聞有天使齎赦至是闔

城生路也諸叛稍稍懈昇遂夜與同盟分擒數十人
城中大定巡撫樊繼祖設倉賑卹迎贊至退諸路兵
諸脅從喜曰詹公活我哉虜聞之亦遁去

十月北虜入寇

由芍藥坡入

十五年八月北虜入寇

由紅寺口入遂掠渾源靈丘殺虜甚衆

九月北虜入寇

由陽和瓦窰水峪鐵果門口入

十六年總兵官梁震出塞擊北虜敗之

震陝西人素著戰功善用人家丁輩樂爲效死充長
于出塞擣營時大同乘兩變之後悍卒縱肆主將每
每其言煦之稍不如意則反唇瞪目或飛章訛語相
搥撼震素知其態率所養家丁三百輩馳至申嚴約
束禁治私聚一軍大驚其家丁輩時時向鎮兵語曰
爾敢蔑主將者恃其衆耳我輩在此無不當自五步
之內恐爾不得用其衆也二月出塞擊虜戰于玉林
川廢宣寧縣斬首百四十餘級三月復出塞戰于紅
崖兒斬首百八十餘級軍聲大震

十七年二月北虜入寇

先是虜由陽和犯塞總兵官梁震及副總兵戴廉遊擊王陞督兵赴之旣而虜由野狐嶺直犯鎮城巡撫都御史史道率都指揮徐珏等以步卒陳于城東東塘坡虜遂南掠至懷仁乃退是役也虜先以偏師誘我兵東出而以大眾向鎮城過城下呼曰爾梁太師何在蓋覘知震東矣時騎兵盡出止存老弱非道出陳幾至不測然虜所殘破亦不勝計

秋七月北虜入寇總兵官梁震禦却之

初張文錦之議築五堡不成水口諸堡悉廢是後虜寇無歲不警警無不至鎮城下者尚書毛伯溫旣總

軍務行邊北望大漠嘆曰大同以蔽鴈門紫荆也鎮北屬堡不立斥堠鮮施則何以遏驅追奔耶乃上疏力言之且曰時不可苟失言不可人棄文錦計畫善而作事失今修復不必仍舊但擇要害土田不必起科但令開墾戍卒不必摘發但取樂從條上諸事巡撫史道力任之是年虜由石靈溝入于是弘賜等五堡初就兵戎新合且城塹爲險可據震督兵禦之虜退

十九年秋七月北虜入寇遊擊戴昇敗績

虜號十萬分二路一入宣府右衛掠順聖東西城尉

州廣靈縣一入弘賜東口掠懷仁渾源靈丘馬邑朔
州復由弘賜東口而出殺戮甚衆昇承調援廣靈至
靈丘北紅山遇虜兵敗死者千餘人

八月北虜入寇

由平虜井坪而入遂掠山西岢嵐等處十二月復由
本路入掠朔州馬邑山陰應州

二十年北虜求貢不許

虜酋俺荅阿不孩者小王子別部也機詐雄于沙漠
至是遣所虜漢人石天爵與虜使一人來言累年犯
塞兵刃殘傷所得諸畜出塞輒死失且北部素通中

國進貢不絕後因小失乖異今願入貢獻馬駝貢道
通則兩不猜忌中國可出二邊懇田北部自于磧外
畜牧請飲血爲盟于是撫臣史道鎮臣王昇以聞

上曰虜情叵測詒我耳 勅樊繼祖督軍務嚴脩備
購斬俺荅阿不孩且無令私得釋石天爵時天爵已
逸去鎮撫俱獲罪後天爵爲戍卒擒斬之

附楊守謙求貢紀壬寅夏俺荅叩邊通款楊職方博
過謙曰俺荅求貢今當何如謙曰宜許楊意亦同及
兵部疏上當道駁之再上而議論異矣旣而斬石天
爵又購斬俺荅夫兵交使在其間況求貢乎殺一天

爵何武借曰不許亦當善其辭說乃購斬之此何理也橫挑強胡塗炭百萬至今無一人知其非者巡撫史道乃以交通外夷擬重罪雖釋不誅當事者悞矣夫今之以貢爲疑者必曰宋以和議誤國不知此貢也非和也九夷八蠻皆許入貢何獨北虜而絕之昔正統北狩也先求貢少保于肅愍公曰和則不可入貢在所不拒不拒云者聖王待夷狄之道也或曰貢使往返畿輔窺我險易不知此易防也館其人于大同進其方物于京師亦何不可今朵顏諸夷不往返乎或曰虜初無誠心假此啓釁不知虜利吾貨何有

不誠連歲入寇豈待有釁或曰驗放之時大惧不虞不知虜衆入寇我倉卒以孤軍禦之驗放有定期定處我徵兵爲備反有虞耶或曰得貨之後彼將敗盟不知犬羊嗜利貪漢財物含哺于前朶頤于後肯自沮乎縱使賣我所失幾何或曰通貢警息我必怠於自治不知怠不怠在我不在貢不貢也嘗恨成化間不能及時設險使虜復貢我以其間暇盡築宣大及花馬池邊內多爲大堡募民盡耕其地使穀賤如成弘間則何爲而不可也昔嘉靖初土魯番求貢當時皆有危言及晉溪王公許之今十數年西鄙少事乃

知當大事者非有真見不可蓄疑者未始不敗謀也

七月北虜入寇

由左衛猪兒窰入掠馬邑朔州遂入楊武峪抵太原
復掠靈丘諸處

二十一年北虜入寇

由左衛吳家口入掠馬邑朔州歷太原汾州平陽復
掠平虜諸處而出虜自六月丁酉入塞至七月庚午
凡掠十衛三十八州縣殺擄男女三十餘萬牛羊豕
畜二百萬衣襪金錢稱是焚公私廬舍八萬區蹂田
禾數十萬頃

二十三年北虜入寇總兵官周尚文禦却之

斬五十餘級虜勢少却

十月北虜入寇

由宣府膳房堡入遂掠順聖東西城蔚州廣靈靈丘
廣昌縣破三家村殺戮幾盡欲叩紫荆馬疲而退宣
府總兵卻末尾虜後不敢戰前鋒官李彬遇伏死之
時總兵周尚文以兵遮虜西路至鳳凰山遇虜尚文
勒軍申令斬失伍者數人合戰頗有獲虜復道蔚州
由陽和瓦窰口鐵炭門而出

秋七月宗人克灼謀通虜以反伏誅

充灼者和川王府奉國將軍也素淫縱與諸惡少比
祿入不給諸惡少譏之曰豈有雄俠如三將軍而長
貧者耶灼行三也時宗人將軍俊桐俊巢等中尉俊
板等亦酗酒無行灼與之善使酒劫掠民間有大雷
公之稱二十三年郡守劉永慶歸灼等禦于門劫其
裝撫鎮以聞奪祿米灼快曰丈夫當舉大事而以掠
數錢爲罪耶乃與俊桐等謀不軌時有羅廷璽與汾
州民王廷榮相友善以左道惑人而諸叛兵向所遣
入虜名衛奉者尚漏未誅或告灼曰廷璽有神術衛
奉知虜中要領有急可使于是灼召廷璽奉至與俊

桐輩軟血盟廷重見灼偽驚伏謁稱臣曰大貴人也
乃糾狂生刻將軍通侯印議遣使奉虜令兵分三道
一入陽和天城一入左右衛一令酋長至城下而已
開門應之徐以兵下平陽自立遂遣衛奉使虜又密
令諸惡少以火箭燔芻場于是渾源山陰右衛平虜
諸芻場同日火總督翁萬達偵知之至鎮城與都御
史詹榮定計榮曰此地易搥湏靜定擒之但當慮其
北走耳召總兵周尚文諭之曰君知虜謀能入吾境
乎亟懸賞購得虜謀或私出塞者詰過之令徧下時
衛奉自虜中還語灼曰已見虜酋察漢兒令製旗若

兵至城下揭旗爲信灼大喜製旗爲表徃謝更許以
大同爲賂付奉與其黨劉大濟王儒復詣虜營奉曰
當道詰遣柰何灼曰以六芻場同日火之故不足慮
也決計遣行而令廷璽至汾州約廷榮爲內應使潛
爲火噐諸不軌物以俟奉等至塞遇墩軍則曰帥府
遣哨料者咸不之疑次日至鎮河村如前對遂出塞
抵榆樹灣遇雨暴諸物適尚文所遣邏徼至鎮河疑
曰無遣而曰遣豈虜謀耶追至榆樹灣得其旗表諸
物于是督撫具灼反狀伏誅

二十四年北虜寇鵜鴿峪守將張鳳生員王邦直戰死

虜寇陽和總督侍郎翁萬達禦却之

先是十九年二十年二十一年之寇率由朔州南逼
鴈門以故總督開府朔州侍郎萬達至乃曰朔雖虜
故道今大同屯重兵三關崇垣屹如虜知之矣太原
諸邑已殘破虜二十三年寇紫荆不利故不及掠洪
蔚今有犯必陽和次洪蔚也陽和居宣大中其鐵裹
門水峪口鵠鵠峪俱要害處乃移鎮陽和以翼蔽宣
大維時原任西路叅將張鳳以獲罪立功在軍門磁
州生員王邦直以武力之士應 詔至又原任總兵
官張達總兵官王昇子國順生員成諧張震儒士尹

秉衡降者火力赤勇士王萬臣輩督府皆厚遇之而
邦直尤加殊禮至是督府分諸人爲二部檄達秉衡
援鐵裹門鳳邦直援鵠鵠峪旣而虜寇鐵裹門達秉
衡挽強弓射却之虜攻盡日秉衡善袖箭長尺許發
中虜皆飲羽虜駭爲神乃攻鵠鵠峪鳳邦直亦射却
之虜復合衆欲稍前鳳不聽成諧呼曰有如虜至逃
山下絕汲道不坐困乎虜鋒已剗直前搏之可走也
遂躍而進鳳語邦直曰前有不虞柰何邦直曰雖不
前虜舍我乎且失成諧無以面軍門大呼入虜陣虜
皆辟易見其兵少無繼遂聚而圍益力鳳爲流矢所

中于是有勸邦直潰圍出者邦直曰吾誓以腔血報
軍門矣衝突入陣奮擊殺十餘人馬僵尸擁遏不得
進乃棄其大刀提鐵簡四面擊之困甚一虜自馬腹
下撲其膝邦直知不免乃曰天也遂自刎虜憤所殺
傷多群斫之虜旣入鶻鵠峪遂南下列營陽和萬達
聞虜入曰邦直死矣乃親出陣而遣勁卒伏白登村
蓋虜掠洪蔚道也檄總兵官周尚文曰急提兵至遮
其歸吾拒其前爾邀其後虜可縛也是日虜以精銳
向我軍督府令開壁門中軍振鼓作樂不之顧而潛
伏死士于兩腋令曰虜叩壁炮發兩翼橫衝斷之左

翼拒外右翼拒內而又偃諸砲及毒火銃數重于壁
門虜不敢犯移陣還營兩翼追之幾造其壘周尚文
得檄馳至陽和山後計曰此去陽和六十里夜不可
進須曉發恐不及且虜連戰疲矣可先聲懼之令喊
于軍者三時靜夜風猛聲聞山前于是虜大懼我亦
以爲尚文兵至也四鼓虜拔營遁我兵追出塞不及
而還于是陽和一禾一畜無失者蓋虜戰鐵裹門鵠
鴿峪已有懼心而中軍之堅壁應兵之時至幾成大
捷云

二十五年六月北虜款塞

石天爵既誅虜不復言貢事至是俺荅阿不孩復遣使款塞言俺荅及諸酋長小王子把都兒官兒台吉俱願入貢兵備副使陳耀親出塞譯審之信督府以聞詔拒之

二十六年北虜遣使求貢不許

虜酋俺荅阿不孩復遣使款塞萬達具疏上言俺荅諸酋求貢不遂而耻將挾衆大舉今猶以貢爲請臣職在封疆奉有嚴旨惟議戰守但兵家之事不度利害恐黠虜匪茹數十萬齊至非我兵可敵耳時巡按御史黃如桂疏奏虜自火篩爲梗貢禮寢廢迄四

十餘年自石天爵倡人貢之請至今又踵行前詐豈可輕信况貢亦寇不貢亦寇者夷狄之故習也貢亦備不貢亦備者邊臣之至計也事貴于先圖法重于申令乞勅督撫嚴加防禦 上曰逆虜連歲寇邊詭言求貢勿得聽從如有執異處以極典時陝西有復套之議當國者故力沮之

二十七年北虜寇天城

初督府翁萬達移近塞墩于長城增卒爲守令曰乘塞兵至則謹飭烽堠乘塞兵罷則帶管塞垣每墩半里許雖小舉舉烽共拒之不數刻所司兵至故冬暮

卒無事及是逼正旦墩卒或私赴城市虜伺便燒暗門入驅羊馬数百去亦有在野被擄者守城諸守備皆被重譴而邊令益嚴矣

八月北虜寇拒牆堡總兵周尚文擊破之

初尚文城拒牆堡在長城外督臣萬達難之既已成矣乃檄尚文伏精騎護禾稼尚文遣家丁設伏彌陀山川禾者出虜果縱数千騎逾山而來家丁逆戰矢盡登山自守一夕五告急督府曰不救是後難使人且虜今不懲後無五堡矣促尚文出師括民車百餘輜列火器其上實以熟食出塞虜易之尚文且戰且

行度虜厚集處火器大發殺傷甚衆遂解彌陀之圍
家丁保彌陀三日不食得車食飽而復戰虜奔斬首
甚衆

二十八年四月北虜入寇射書求貢

虜耻款貢不遂又以前二十五年使者保兒賽入求
貢被殺益憤恚縱掠塞下且射書來以爲許貢則當
約束部落令不犯邊否則秋且入關奪搶進逼京輔
虜知我兵怯又數入得利故言辭桀驁要挾無忌遂
率衆由樺林兒至松樹墩登暗門潰牆而入寇大同
左右衛及威遠等處攻燬堡塞五十餘所

二十九年虜犯大同總兵官張達及副將林椿死之

時虜酋俺荅率衆數萬由小鶯圪塔墩口入大同塞計伏精銳谿谷中以羸騎百餘爲餌偵卒信之走白達達素果敢徵兵未集遽率麾下卒馳擊之伏發圍達數匝馬蹶見殺椿分兵擊虜零騎于彌陀山聞達被圍不介馬而馳援達亦中流矢死虜得二將首輒引去事聞上嘉其忠各贈官賜謚立祠祀之達陝西人目不知書然慷慨負奇節齊力絕人平生遇敵好摧營陷陣所向有功卒以此敗邊人至今稱之

八月虜窺大同咸寧侯仇鸞賂入薊州遂薄內地詔

以鸞爲平虜大將軍總督勤王師

先是虜酋俺荅脫辛愛等自威寧海移駐斷頭山并調集套虜聚衆數十萬謀深入總督蘇佑初至請益兵餉不報俺酋狼台吉擁衆窺大同時威寧侯仇鸞繫獄甫釋賂大學士嚴嵩起爲宣大總兵至是聞謀告惧甚私遣其厮養時義以重賄結俺荅令別寇宣府或薊州無犯大同虜遂東去寇薊鎮由朵顏三衛入虜之東也鸞實使之乃佯奏探知虜東行意在侵薊恐震京師請親提兵居庸以備不虞是月乙亥虜攻古北口自間道至黃榆溝挾牆入我兵不能禦

遂長驅入內地京師戒嚴 詔諸鎮兵勤王 命文

武諸大臣十有三人分守都城各門又 命都御史

商大節督科道官募民間材官子分置城陴 上思

鸞言檄召鸞亟引兵發居庸前禦虜徵各路兵入援

尚書徐階言兵部欲發兵外護關廂恐京軍見敵輒

走反搖民心鸞兵入衛宜令兼督城外諸軍大約以

大同人馬爲京師先鋒以京師人馬助大同聲勢庶

兩有所恃時鸞先已駐師居庸首得 命以大同兵

三萬三千至 上卽軍中拜鸞爲平虜大將軍總諸

鎮兵 賜玉帶上尊又 賜密啓封記曰朕取重惟

卿一人得密啓奏事于是虜犯天壽山東山口 康
陵菓園等處 上命鸞嚴護 陵寢鸞馭軍無律諸
軍恣肆刼掠民間莫能禁以鸞方被寵雖獲大同軍
行掠者不敢治必以聞 上謂大同首入援軍行掠
出饑疲耳送鸞收撫不問虜自河東渡潞水西北行
蹙擄村落勤王兵無敢撓其鋒者至東直門執 御
廐內臣楊增以去僉咎不之殺即令增持番書入城
求貢 上召學士嵩禮部尚書徐階議階曰今虜駐
近郊而我戰守備一無所有宜權許以款第恐將來
要求無厭耳 上曰苟利社稷皮幣珠玉皆非所愛

階曰止於皮幣珠玉則可萬一有不能從者柰何

上竦然曰卿可謂遠慮然則當如何階因請以計款之言其書皆漢文 朝廷疑而不信且無臨城脅貢

之禮可退出大邊外別遣使齎番文因大同守臣爲奏事乃可從如此往返之間四方援兵皆至我戰守有備矣 上然之集廷議未一會虜以得利去京師解嚴虜先以輜重北行餘兵分掠京城外欲西奪白羊口出仇鸞率諸將兵尾其後白羊守將扼險禦虜虜不得出稍棄牛羊婦女關下擁衆東南還至昌平猝與鸞軍遇鸞不意虜返倉卒未陣虜騎蹂入我兵

不戰而潰死傷千餘人鸞幾爲所獲以裨將戴綸徐
仁救免虜長驅至天壽山見總兵趙國忠列陣紅
門前不敢入出橫嶺口趨至懷來川出塞去是時虜
衆疲甚又頗戀輜重皆不能軍諸將以白羊之敗兵
氣不揚竟不敢逼但尾送至石匣城及張家古北寺
等口而返

詔咸寧侯仇鸞留京以徐珏代爲大同總兵鸞議以冬
月大舉北伐從之

鸞上議大舉北伐先遣京營諸將分詣各邊訓練士
卒以待師期而親駐宣大間整飭兵甲俟冬月大舉

往犁虜庭以舒華夏之氣 上嘉之命戶部大括各處積貯及歷年通負以備軍興鸞率諸鎮兵至宣大聲言擊虜不敢出塞稍至近境夜襲斬老弱數級還鸞乃自劾無功 上慰諭之

三十年三月 詔開馬市

冬虜酋俺荅叩宣府邊求貢 廷議皆言虜逆天犯順法所必誅爲中國計但當整飭六師爲戰守備徐察其效順果誠然後議之未晚也 上然之命所司不得輕信弛備是時仇鸞雖揚言北伐實內畏虜乃密遣廝養時義結俺荅義子脫脫使俺荅以貢馬互

市爲請俺荅利我貨幣投驛書于宜大總督蘇佑求
通市佑以聞鸞從中力主之言永樂成化間嘗設馬
市于遼東待海西女直及朵顏三衛今虜求開市留
使爲質縛叛示信宜暫行兵部尚書趙錦議與鸞同
上意未決問大學士嵩嵩以一年四次用馬價十
萬兩期密而費廣且犬羊無厭將來難以阻限惟一
年二次爲宜上然之乃起兵部尚書史道總理互
市

初開馬市于鎮羌堡

俺荅與子脫脫等令虜人驅馬至城下計值取價共

易馬二千四百餘匹事竣俺荅貢良馬九乞再市鸞
請 降勅厚賚之先是有華人蕭芹王得道喬源丘
富者持白蓮教出入虜地爲奸俺荅以爲小酋丘富
教虜以火食屋居虜居之輒撼有聲不敢入乃築板
升以處芹等是時馬市甫畢芹等恐虜與中國通不
利于已乃賄俺荅左右犯左衛以開蒙侍郎史道客
踪跡之以其事聞 上命購取妖賊無留虜鸞因遣
時義啖俺荅以利諷令執芹等三十人械塞下于是
加鸞太子太傳道兵部尚書時義進指揮僉事

詔總理兵部尚書史道還京

初道主開馬市於宜大自三月至五月二鎮市完虜
又以牛羊易換米豆爲請道上言近者俺荅令人執
送蕭片而來脫脫諄切告言虜中富者以馬易段貧
者止有牛羊請易米麥臣以爲虜之富者十二三貧
者十八九不一通融貧者必爲饑寒所迫衡決約束
有妨大計大學士嚴嵩不可 上以道不思處置邊
備乃爲牘奏遂令還京自是虜衆謂中國不足信復
時時剽掠境上然尚嗜利未肯公言大舉邊臣亦與
互易不絕以中其心大率畏而啗之無復前時制馭
羈縻之策矣逾年好復絕

三十一年北虜寇大同鶯李塞將尚表守備劉勳禦之敗績再犯團山墩遊擊李桂棄其軍遁虜入大同塞指揮王恭禦死之

先是虜叩市大同巡按御史李逢時謂 詔禁非時開市叱去逮諸通事于獄至是俺荅遂縱賊入掠一犯雙溝鶯李塞再犯團山諸將披靡警報沓至逢時上言虜敢于擁衆入犯馬市難恃宜行各督撫合兵征勦仍 勅京營大將仇鸞發兵進征趙錦亦言鸞領各邊兵六萬八千又宣大戍卒十一萬天下精兵無以逾此大振兵威用張殺伐此其任也 上曰兵

馬旣多即令大將分布逐勦時鸞偃蹇畏懦不敢發
兵而大同總兵徐仁復驕縱朘削爲士卒所怨巡撫
何思亦以通市故禁邊軍拒虜殺者抵死以故虜出
入關隘動稱貢市其狡黠者變服入城莫敢誰何至
是虜衆萬騎突入塞抵懷仁縣管家庄大掠居民總
兵徐仁副將王懷邦等各逗留擁兵不進惟中軍指
揮王恭率所部禦虜戰于管家庄力屈死總督蘇佑
上其事 上命兵部偵虜衆多寡亟以聞 詔逮繫
仁等削何思籍贈王恭指揮僉事

詔大將軍咸寧侯仇鸞帥師赴大同勦虜鸞襲虜塞外

敗績

時虜犯大同益數驚內不自安乃請出邊正罪然驚實無意討賊第爲大言以自解大學士嚴嵩以寵信之深不可間至是亦欲因事以暴其失乃上言鸞逗留不戰上始疑鸞不足恃鸞旣至鎮偵報虜衆僅數千住牧威寧海側鸞喜虜少欲襲有其功乃帥戴綸等統衆萬餘夜馳二百里比曉及之虜覺悉衆突出鸞等倉皇退走殺傷官軍一百二十六人射死馬百餘匹鸞奔還途中斬零騎六級上疏言狀且張其伐兵部言傷多獲少何以言功上曰斬獲雖

少勤勞宜錄亦賞賚有差

總督侍郎蘇佑等出塞擊虜敗績

佑與巡撫侯鉞總兵吳瑛協謀出塞擊虜虜酋俺荅及把都兒會兵逆我師殺指揮劉欽等七十人士卒死者甚衆瑛急歛衆自衛遁歸言官劾佑等部覆以虜勢橫甚各官親冒矢石雖未獲全勝而深入力戰足寒虜心宜少寬以作士氣上從之仍令優卹欽等七家

三十二年北虜大舉入寇

俺荅把都兒分道由弘賜堡邊境合衆入渾源東犯

靈丘廣昌諸處

九月虜由平虜衛犯山西

虜萬騎由大同平虜衛犯山西神池利民堡山西都御史趙時春帥馬步軍自出禦之至廣武謀報虜止二千可擊時春探申欲馳總兵李洊阻之不聽及遇虜于大虫嶺伏兵四起洊與其子松皆戰死時春僅以身免

三十三年虜入大同塞總兵岳懋死之

時虜騎數萬大同帥岳懋帥師出禦彼衆我寡左右夾擊力屈而死全軍覆沒巡按毛鵬以聞上逮侯

鉞及前督臣史道削籍贈懋官

冬虜寇大同總督許論巡撫王忬擊走之

捕首虜百餘牛羊稱是

三十四年詔以馬邑生員張蕙爲所鎮撫

初蕙五月間爲虜所獲俺荅令其主馬籍因知其數
又嘗送置丘富營頗得其謀在虜中凡二月得間奔
歸言俺荅二部共可二萬六千人丘富日夜導虜爲
鈎梯攻城遣舟渡河靜樂等縣妖人廬山佛等許爲
內應以接俺酋宜預備之總督許論上其事乃優錄
蕙爲歸義者勸

三十六年北虜寇入鴈門塞

虜入鴈門塞二十萬破應州四十餘堡巡撫閻煦乞兵應援總督侍郎楊順恐失律當坐乃令總兵殺避虜民婦上首功以自解

三十七年虜圍大同右衛

初俺荅子辛愛第三妾桃松寨與部目收令哥通辛愛欲殺收令哥令哥惧投降于總督楊順順自詔爲奇功以夷男婦致闕下辛愛遣騎來索不得乃攻毀諸墩堡畧盡順惧復上言虜情叵測欲脅朝廷歸之未決俺荅子黃台吉詐請以我叛人丘富易桃

松寨巡撫朱笈請姑許之以弭邊患乃遣桃松寨收
令哥等遠辛愛召諸婦環視磔裂之知順無能負約
不執丘富而攻圍右衛益急 詔閑住總兵尚表護
運入右衛虜圍之數重經月不解巡按路楷亦言右
衛城中勢若倒懸危在旦夕 上聞而大駭卽發帑
銀十萬以濟緩急逮楊順路楷許論而以兵部尚書
楊博出督宣大兵博至徵諸鎮卒聲言伐虜羽檄日
十數下鎮撫等又選集主客兵數萬嚴部而進虜聞
大兵至拔帳遁遂以是日入右衛城所運糧凡四千
餘石居民感泣呼聲震地人人自爲更生先是有倡

言宣大可棄者上問嵩嵩設爲難詞欲上自棄之
上不可急措餉發兵更易文武大吏而虜尋引去右
衛以存上初用尚表猶慮其老不能師命薊州
副將馬芳領所部赴之表在右衛相拒四閱月誓衆
勵志死守不屈至是楊博上其功上大嘉悅進尚
都督僉事御史樂尚約言右衛殘破宜大加賑卹
上納之

詔召還總督尚書楊博

博在宣大有首索素雄塞外屢肆侵擾博計擒之斬
其黨十有五人時出奇兵襲虜虜徙帳去上嘉之

至是薊有虜警 詔博遠總督薊遼

三十九年總兵官劉漢擊虜于灰河破之

時虜聚喜峯口外窺犯薊遼漢乘其虛督兵自鎮河口出塞搗虜帳于灰河斬首二十八級虜狼狽西遁自遼鎮多事以來官兵積懦虜留巢逼塞無敢問者至是漢有是創嗣後各鎮効之虜始惧稍稍徙遠其幕云

秋七月總兵劉漢破虜于豐州

大同右衛邊外由王城舊城而北經二黑河歷三百里其地曰豐州崇山環合水草豐美叛人丘富趙全

李自馨居之築城建墩構宮殿開良田數千頃接東
勝州號曰板升者華言城也富等以白蓮妖術嘗教
虜入寇攻城具時俺荅引衆西掠閱二年僅留千餘
騎守老弱又夏徙大青山口外避暑漢與都御史李
文進謀曰是可襲而取也部分叅將王孟夏麻祿等
率銳卒三千馳往漢與趙奇以重兵分三哨營于玉
林隘爲後勁孟夏等裹糧疾走擊斬八十三級生擒
七十六人焚其宮室餘衆奔匿時富隨虜北走趙全
匿墩上招虜騎至我兵引退還渡黑河與大兵會往
返凡五日總督葛縉以聞上大悅升賞有差

九月虜入寇 詔總督侍郎葛縉帥兵赴朔州邀擊之

虜由拒門堡大川墩處入寇進屯朔州復移營而南攻山西盤道梁越關大掠葛縉上言虜賊初屯朔州臣已遣宣大兵馬西援及賊深入親臨廣武調度第彼衆我寡乞將入衛遊兵二枝并保定勁兵二枝赴本鎮圖戰守 上計賊必出朔州 詔縉亟帥兵赴朔邀擊之既而虜從間道去乃止

四十四年叛人李自馨等叩邊請降不受自馨叩邊率衆歸降總督以聞兵部惧有後患行督

撫悉心計處勿即許之

隆慶四年九月把漢那吉來降

見封貢考

五年北虜俺荅受封入貢

封俺荅爲順義王虜婦三娘子爲忠順夫人黃台吉等升賞有差詳見封貢考

萬曆十一年北虜興克都隆襲封入貢

萬曆壬午俺荅故其子興克都隆黃台吉于癸未歲襲封

十五年北虜檣力艮襲封入貢

萬曆丙戌黃酋故維時封事 朝議異同督臣鄭洛
力持之丁亥歲黃台吉子檣力艮得襲如故事

四十一年北虜卜失兔襲封入貢

萬曆丁未檣酋故子朝兔早死嫡孫卜失兔癸丑歲
始襲封甲寅入貢詳見封貢考

一卷終